

INA PRESA EROT... ÄH: EXOTICA

da Silvana Derungs

Il sulegl stgauda, sumbriva datti mo sut las palmas, la gliud è brina, da buna luna, porta mo chautschas da bogn, baiva latg da cocos e sauta salsa cun mintga chaschun. È quai il maletg che nus avain da l'exotica?

Per il pli associain nus – u forse mo jau? – cun «exotic» insatge da las sferas chaudas dal sid, malgrà che quest pled cumpiglia l'ester en general. Ma nua cumenza atgnamain quest «ester» per al denominar sco «exotic»?

Dependi da la distanza?

Cumenza l'exotica gia suentar ils cunfins svizzers? U pir ordaifer l'Europa? In Eston n'è per nus probablamain betg anc fitg exotic, u? Ed in Grec? Ma ina Puertoricana è franc pli exotica? E co statti cun ils Athabascas, in pievel indigen da l'Alasca? Èn quels exotics? Per nus? Malgrà ch'era els èn lunsch davent, para la Puertoricana insaco tuttina dad esser pli exotica, u betg? Cunzunt, sch'ella è giuvna e bella e porta in bel surrir ed ina rassa curta curta. Vul dir, è exotic era cumbinà cun erotica? (E tge fiss gliez lura exact?)

Ma sche tut quai che savura mo in zic da pajais esters, da sferas meridiunalas e chaudas, è exotic per nus, tge è lura exotic per quels da là? Per ina Giapunaisa è in um finlandais franc insatge fitg exotic, m'imagin jau uss. È quai ussa discriminont, sche jau titulesch tschertas naziunalitads per pli exoticas che autras? Sche jau taxesch la Caribica u la Cambodscha per pajais pli exotics che Kasachstan u las Inslas dal Falkland? È «exotic» insumma in attribut positiv u forse negativ?

Mango u frajas?

Jau na sai betg precis nua ch'il cunfin geografic-cultural-etnografic da l'exotica è. Ma en noss mintgadi inscuntrain nus franc situaziuns, nua ch'ina u l'otra chaussa è pli estra per nus, e forse era pli exotica. Nua tirain nus il cunfin? Tge è pli exotic per tai?

- Metter geranis, basilicum u palmas sin balcon?
- Litgar in glatsch da mango u in da frajas?
- Sunar batteria u steel-pan?
- Lavar ils chavels cun schampo dad exotic-fruit-mix u da flur-chaminella?
- Purtar chautschas sut alvas, cun muster da leopard u cun figuras da comic?
- Emprender il saut da standard, il saut popular lettonec u il saut dal venter?
- Empustar ina Corona u ina Calanda?
- Ir en vacanzas a Timbaktu, Rio de Janeiro u Zagreb?
- Laschar far in piercing, in tatoo u insumma nagut?
- Ir a l'open air da schlager popular, al hardrock open air u a l'open air da goa?
- Mangiar in mail, ina melona u in ananas frestg?
- Leger La Quotidiana u Men's Health?
- Ir a curren, dar golf u far capoeira?
- Purtar crocs, sandalas u flip-flops?
- Sa platgar per 4 uras davant la televisiun per Lord of the Rings u per in film da Bollywood?
- Cuschinar paella u tartuffels en paletscha?
- Mover las chommas tar discofox u merengue?
- Baiver vinars da giansauna, sake u malibu?
- Purtar in portasain u betg?
- Avair sco animal da chasa ina tarantella, in canarin u in giat?
- Unscher en il corp cun ina loziun da nuschs da cocos u dad ampuanas?
- Navigar cun l'aissa da surf sin l'aua u surfar en l'internet?
- Eleger dal menu il curry cun chutney dutsch-asch u la liongia viennesa cun mustarda da Dijon e paun rustica?
- Dar jass u playstation?
- Guardar Winnetou, Karate Kid u Dirty Dancing 2?
- Charrar in Subaru Justy u in Maserati Gran Turismo u spetgar sin l'Electro-Smart?
- Sunar ghitarra u sitar?
- Ir al concert dal chor viril Alvra, dal Gospeltrain Favugn u da Nina Hagen?
- Fimar cigaretta, stumpa, tschiccar tubac u laschar la detta dal nicotin?
- Chavels curts u chavels lungs u vokuhila?
- Giudair la stad cun il corp sura niv, en ina chamischa da hawai (datti insumma anc da quella?) u en in t-shirt cun il crocodil?
- Sa grillar sut il sulegl u anc purtar ina sblatgezza nobla a la fin da la stad?
- Trair en slip, panty u string?
- Far l'amur en letg, sin balcon u en il gaud?
- Abunar il National Geographic u las Punts?